

欽
定
全
唐
文

欽定全唐文卷七百七十五目錄

李商隱 五

上座主李相公狀

上漢南李相公狀

上李太尉狀

上河中鄭尚書狀

上許昌李尚書狀

上許昌李尚書狀

上李尚書狀

上漢南盧尚書狀

上易定李尚書狀

上忠武李尚書狀

上度支盧侍郎狀

上度支歸侍郎狀

上華州周侍郎狀

上江西周大夫狀

上崔大夫狀

上河陽李大夫狀

上河陽李大夫狀

上孫學士狀

上容州李中丞狀

上韋舍人狀

上劉舍人狀

上鄭州李舍人狀

上鄭州李舍人狀

上鄭州李舍人狀

上鄭州李舍人狀

上李舍人狀

上李舍人狀

上李舍人狀

上李舍人狀

上李舍人狀

上李舍人狀

上李舍人狀

賀翰林孫舍人狀

上鄭州蕭給事狀

上河南盧給事狀

上張維端狀

上任郎中狀

與白秀才狀

與白秀才第二狀

欽定全唐文卷七百七十五

李商隱 五

上座主李相公狀

伏見恩制相公以五月十九日登庸清廟降靈蒼生受福
動植之內歡呼畢同某下情不任忭賀踴躍之至相公稟
潤咸池承光太極業傳殷相族預周盟爲羣生之司南作
九流之華蓋自頃文場鞠旅冊府揚鑣坐奮英詞折班馬
之方駕入陳嘉話納晁董之降旗百家無抗禮之人六藝
絕措詞之士一昨秋官分寵風憲兼司克揚典刑肅整嚴

裁重以潞潛逆孽帝命遄征賁赫之告變雖來蒯徹之說
詞未已人懷顧望師有逗留相公斂笏忘家單車就路明
宣朝旨密授兵機謀窮遁甲之精辯得鈐經之要遽使戎
臣釋位謀士資忠兇渠計盡而就誅逆黨死前而知悔太
行九折復連洛宅之封疆啟聖千門更降明皇之歎息寧
聞伐善愈恐書勲魯司寇三日之間戮正邪於兩觀之下
漢司隸一旬之內取張朔於合柱之中並罪得匹夫功非
方面苟將擬議良匪同途而又代朔舊戎沙陞小梗旣謀
元帥果在賢王相公復以全謀副司戎重遠揚威畫尋以

懷柔牋函屢獻於懿宗旣戮亟征於內府雖西京哲輔例
有重封東晉元僚率多兼領亦罕有下韞必中投刃皆虛
曠百代以求人誰一日而爭長今果允扶下武顯踐中樞
贊光宅之大猷調復古之元氣往者傳嚴佇相唯升版築
之夫渭水載占正獲竿緡之叟又豈若相公本枝分慶出
自疑流輝襲康叔之親賢稟太邱之道德蕭何家謀不聞
代有鼎司鄧禹外門詎是族傳宰匠苟非君子之澤寧光
史氏之書佇見扶祐休期修明盛禮南鷄東鰈徒頒饗帝
之羞魯甸梁山待瘞事天之檢某嘗因薄伎猥奉深知麟

角何成牛心早啖及茲沈滯獲廕變調瞻絳帳以增懷望
台星而興歎昔吳公薦賈非宜銓管之司孔子鑄顏未是
陶鈞之力比誼恩重方淵感深嗟覩與以未胡但濡毫而
抒懇崔氏之乃心紫闕陳生之思入京城千古揆懷一時
均慮臨風託使指景依人柱礎成潤於興雲轍鮒何階於
泛海下情無任忭賀踴躍攀戀感激之至

上漢南李相公狀

不審近日尊體何似彼州是號輿區又稱勝槩羊叔子之
事業方爲用武之邦庾元規之風流更是徵文之地人彊

而壽氣厚且深伏計戎律旣貞詔條盡舉峴山同峻漢水
俱清遠想亭皋如飛木葉柳宮務間蓮幕才多杜鎮南魯
史之餘山太守習池之宴非留車允卽送范雲歌郢中繞
雪之妍舞江上弄珠之態樂而不極歡且無荒況彼親鄰
又其令季當時鈞軸已相推於弟瘦兄肥此日藩方復共
慶於家齊國理外威諸夏內屏明廷昔晉室簪纓宋朝人
物謝萬已稱富貴孟昶尋處威權而安石東山尚爲正士
彥重白屋猶是布衣未有鴻雁成行鵲鵲接翼入共鏘金
鳴玉出聯大邑高封擁甲多踰萬人列土盡方千里政同

魯衛地則冉康方將稟慶於高廟之靈誰敢不忠於大君
之側某爰初筮仕卽奉光塵接班固於蘭臺陪東暫於東
觀悲歡三紀契濶四朝算存歿之途數弔慶之問永惟庇
賴獨在高明而方限山川遠違門館嚮風慕義鏤骨銘心
儻蒙識以後凋知其不調敢以尊主安人之誓遠承左提
右挈之恩下情無任瞻望攀戀之至

上李太尉狀

伏奉別紙榮示伏承以所撰武宗一朝冊書誥命并奏議
等一十五軸編次已成爰命庸虛俾之序引捧緘汗下揣

已魂飛久自安排方見髣髴作春秋而救亂由有素臣刪
風雅以刺時寧遺小序式蒙善誘安敢固辭伏惟武宗皇
帝英斷無疑睿姿不測綠疇緝美瑞鼎刊規太尉妙簡宸
襟式光洪祚有大手筆居第一功在古有夙構之疑食時
之敏片辭相炫小道可嗤將以擬人固不同日榮示中所
引國朝文字實炳儒林然其間有行實非優附會成累終
衰鳳德或露圭瑕豈若世顯華宗代光相座潔隨武之家
事纂鄧傳之門風廟戰之權風行於萬里國儉之禮日聞
於四方言不失誣事皆傳信固合藏於中禁付在有司居

微詰說命之間爲帝典皇墳之式某更祈旬月庶立紀綱
先深鄙陋之慙已望優容之德甘瓜苦蒂必興歎於墨子
羔裘豹袖足貽刺於詩人荷戴之餘兢惕又積伏惟特賜
照察

上河中鄭尚書狀

不審近日尊體何如尚書居敬行簡自誠而明踐履華資
彰灼休問頃者廉居察俗露冕臨人當分陝水旱之餘控
二京舟車之會空懸竹使不坐棠陰閉閣而四民自安移
書而百城向化爰歸司會是總掄材且去四總八達之謠

鄙拔十得五之少不容私謁大闢公途論辯有光訾相無
失蔡廓之不署紙尾王惠之莫發書封欲以儼人實在異
日固合便登台座光贊帝謨蓋以德水名都條山巨鎮北
控并代東接周韓作皇都之股肱擁朔方之兵甲是以暫
勞大施惠此一方浹以仁聲先之和氣昔何武之揚州入
輔黃霸自潁川登庸今古一時賢哲相望側聆後命是亦
非遙某早獲趨承常深獎眷末由祇謁無任馳誠

上許昌李尚書狀

伏承旌幢尋達忠武二十五翁尚書克有懿德允叶休期

式揚扞屏之功嘗在重難之地頃者河橋作鎮當街亭失
律之初上谷受符值卿子喪元之後折簡之誥單車繼來
致伊臯旣之邦服我平明之化况茲間歲亟立殊勲虜帳
夷妖壺關伐叛旁資巨拔遙藉聲言十萬橫行樊噲長思
破敵三千有勇仲由且使知方實兼文武之全才以處親
賢之重寄今者靈臺偃伯衢室歸尊永言台鉉之司合屬
閒平之允豈令歲序久滯藩維潁水云清許田斯開汝南
古多賢士維揚舊號勁兵政令旣明歡娛多有投壺雅宴
祭遵豈以爲妨望月登樓庾亮祇應不淺載懷往歲屢奉

初筵今則貧病相仍起居未卜遠思鄒馬方陪密雪之遊
遐望荀陳尚阻德星之會瞻望恩顧不任下情

上許昌李尚書狀

王十二郎十三郎扶引靈筵兼侍從郡君今年八月至東
洛訖聲塵永已門館依然仲宣非女聾之才昔慙劉氏安
仁當國士之遇今感戴侯仰計交情良深軫悼下情不任
感慟之至

上李尚書狀

昨者伏蒙恩造重有霑賜兼假長行人乘等以今月十日

到上都訖既獲安居便從常調成茲志願皆自知憐伏以
無褐無車古人屢有饋飧受館諸侯不常皆才可持危扶
顛辯或離堅合異尚有厯七十國而不遇其主曠五百歲
而方希一賢道之難行運不常會苟至於此知如之何某
始在弱齡志惟絕俗每北窗風至東皋暮歸彭澤無絃不
從繁手漢陰抱甕寧取機心巖桂長寒嶺雲鎮在誓將適
此實欲終焉其後以婚嫁相縈弟兄未立陽貨有迷邦之
誚王華生處世之心靡顧移文言從初服幸李公之閣者
不拒孔融讀蔡氏之家書未歸王粲竊聞六蔽聊翫九流

行與時違言將俗背方朔雖彊於自舉匡衡竟中於丙科
駕鼓未休搶榆而止然竊觀古昔之事遐聽上下之交有
合自一言獎因片善不以齒序不以位驕想見其人可與
爲友近古以降斯風頓微處貴有隔品之嚴於道絕忘形
之契中間柳澹年猶乳抱李北海因與結交裴遜跡困泥
塗王右丞常所前席時之不可人以爲悲愚雖甚微頗嚮
斯義自頃昇名貢籍廁足人流未嘗輒慕權豪切求紹介
用脅肩諂笑以競媚取容衮生之門但聞有雪墨子之突
曾是無烟每虞三揖之輕畧以千鈞自重閣下念先市骨

志在采葑引以從游寄之風興玳筵高敞畫舸徐牽分越
加邊事殊設醴憐賈生之少恕禰衡之狂此際舉觴而恨
異漏卮對案而慙非巨壑謝家東土延賓而別待車公王
令臨邛爲客而先言犬子彼之榮重殊謂寂寥伏聞聲塵
已移弦晦隋王朱邸方同故掾之心燕地黃金更落他人
之手追攀未及結戀無任瞻望門牆若在霄漢伏惟始終
識察

上漢南盧尚書狀

某頃以聲跡幽沈音輝懸邈空滅許都之刺竟乖梁苑之

遊於服義而徒深顧歸仁而尚阻今幸假塗輿壤赴召遐
蕃越賈生賦鵬之鄉過王子登樓之地豈期此際獲奉餘
恩而又詢劉苑之世親問樂卻之官族優其通舊降以清
談言念古人重難兄事季布始拜於袁盎蕭何近下於周
昌將用比方彼有寥落徒迫於祇役嘗抱沈疴空思韋曜
之茶莫及孔融之酒遂不得仰霑美祿一中聖人歌山簡
倒載之歡暗定國益明之量草感上道徘徊樂鄉况蒙衛
以武夫假之駿馬前騰卸路却望漢皋俯緣逐逐之姿翻
阻遲遲之戀封牋寫邈下筆難休尚書三兄鎮靜上游儀

刑羣后平南讓勇征北推能固當已注宸襟卽歸台席夫
歲星降氣嵩岳生神苟鼎鼐之可逃則天爵而何寄伏惟
特以蒼生爲慮也某材誠漏薄志實辛勤九考匪遷三冬
益苦引錐刺股雖謝於昔時用瓜鎮心不慙於前輩倘得
返身湖嶺歸道門牆麤依鳴益之餘以奉陶鎔之賜則尚
可濡毫抒藝殺竹貢能記錄咎繇之謨注解傅巖之命庶
於此日不後他人伏惟始終識察

上易定李尚書狀

某疾穢餘生偶存晷刻豈期妻族亦構禍凶故司徒公內

行政聲鬱爲人傑一昨奉辭伐罪克壯其猷躬節鼓旗親
臨矢石家財給於公用子弟散於行間始退舍以致師終
設奇而覆寇敢問古之名將何以加焉安知垂立大功遽
茲薨落伏弦撫斂實有遺音行路之人莫不相弔某窮辱
之地早受深知遂以嘉姻託之弱植雖冶長無罪堪成子
妻之恩而呂範久貧莫見夫家之盛今則車徒儼散棟宇
蕭衰撫歸旄以興懷弔病妻而增歎酸傷怨咽敢類他人
伏以姻懿年深交游跡密遠味復圭之美當追命駕之恩
謁叙末由悲慨無地

上忠武李尚書狀

不審跋涉道路尊候何似伏計不失調護先皇以倦勤厭
代聖上以睿哲受圖系萬國之往居集兆人之悲慶况二
十五翁尚書望兼勲舊地屬親賢績久著於藩垣任合歸
於陶冶今者果應急召咸副僉諧凡在有心莫不延頸竊
料皇闈入謁紫殿承恩覩山邱之端容睠鼎角之殊相便
當講惟新之政備爰立之儀伏惟促動前騶速光後命發
仲父新柴之井運留侯前箸之籌允贊昌圖亟登壽域天
下幸甚某猥以庸薄厚沐恩憐荏苒光陰纏綿詞旨難屯

少裕違奉淹時家艱頻臻人理中絕未經殯訃莫獲祈迎
仰望清光實動丹款伏惟特賜恩照

上度支盧侍郎狀

某行己及鄧州迴望門闌如隔霄漢感知佩德不任血誠
某揣摩莫聞疎拙有素侍郎獎其薄伎夙降重言而時亨
命屯道泰身否屬茲淹蹟不副提攜今者萬里銜誠一身
奉役湖嶺重復骨肉支離交廣之歎哀忠荆蠻之悲王祭
思人撫事古亦猶今惟當幽禱鬼神明祈日月伏願榮從
司計入贊大猷鼓長檝以濟時運洪鈞而播物則某必冀

言還上國來拜恩門一吐漢相之茵一握周公之髮斯願
畢矣伏惟圖之伏計亦賜念察薛郎先輩早敦分好實慕
風規是敢託以緘題致之几案就有心懇資其口陳攀戀
之誠輸罄無地

上度支歸侍郎狀

不審近日尊體何如伏計不失調護昔周以冢宰治國用
漢以丞相領軍儲典故具存選倚爲重侍郎自膺新寵益
副僉諧竊計旬時便歸樞務某幸因科第受遇門牆辱累
已來孤殘僅在牋封曠絕歲序淹遐棄席遺簪託誠無地

伏許亦賜哀察至冬初赴選方遂起居未間下情不任攀戀

上華州周侍郎狀

某文非勝質黠不半癡辛勤一名契濶九品獻書指佞遠
媿南昌懸棒申威近慙北部竊思頃者伏謁於遊梁之際
受知於入洛之初彭萊自媒率多徑進襍衡懷刺幸不虛
投爾後以地隔仙凡位殊貴賤十鑽槐燧一拜蓮峰眎睽
未忘吹噓尚切已吟棄席忽詠歸黃倘或求忠信於十室
之間感意氣於一言之會聖人門下不聞互鄉童子車中

匪輕壯士則猶希薄伎獲蔭清光雖曠闕於門牆長髣髴
於旌檠驥疲吳坂已逢伯樂而鳴蝶過漆園願入莊周之
夢下情無任攀戀感激之至

上江西周大夫狀

不審自到鎮尊體何如德修於身功及於物伏料福履常
保康寧皇帝體上聖之姿膺下武之慶爰從近歲式建崇
功岱北清夷山東靜謐雖神謀獨運首開樽俎之間而國
用取資終賴江湘之入今者方體三革欲鑄五兵燧火庖
犧鴻名肇建明臺衢室鳳歷將新固當繁省以正幽明更

中外而化勞逸有周室分陝之相有漢庭就國之侯則必
夢想外藩東來羣后以文武兼資者持政柄以理行尤異
者講化原實惟明公合首列辟伏惟爲國自重某叨蒙恩
顧頗漸歲時瞻賴之誠造次於是伏惟特賜信察

上崔大夫狀

今早七弟遠衝風雪特迂車馬伏蒙榮示兼重有卹賚謹
依命捧受訖某才不足觀行無可取徒以四丈頃因中外
最賜知憐極力提攜悉心指教以得內誇親戚外託友朋
謂於儒學而逢主人謂於公卿而得知已竊當負氣因感

大言豈謂今又獲依門牆備預賓客禮優前席貺重承筐
欲推讓而不能顧負荷而何力倘或神知孔禱師恕柴愚
王真而三獻不疑女貞而十年乃字羸期率勵以報恩知
伏惟特賜鑒察

上河陽李大夫狀

不審自拜違後尊體何如二十五翁尚書挺生公族作範
儒流踐履道義之門優遊名教之樂伏計頤衛無爽康寧
此蓋人所禱祠神保正直下情伏增忭賀之至富平重鎮
成皋巨防自頃太守非魏尚之才司馬失穰苴之令坐墮

戎律乾沒軍租誰謂殷若長城翻見盡爲敵國二十五翁
允膺宸眷出總藩條心作靈臺潛運黃公之畧手爲天馬
暗開元女之符單車以馳杖節而入盡羈駭獸先殪捷猿
然後蘇彼疲羸惠此鰥寡免飛芻輓粟之弊除橫征擅賦
之門昨者故侯實有逆子敢因微策密有他圖人得而誅
天奪之魄盡窮餘黨半在中權此際誠合絕洹水之波腥
長平之草二十五翁曲分蘭艾大別淄澠飛魂不冤枯骨
猶媿此真所謂仁者之勇無敵丈人之師以貞名冠百城
功高一代而又梁園竹苑素多詞賦之賓濞浦桂藂廣集

神仙之客以思柔之旨酒用順氣之和聲初筵有儀一石
不亂某才非擲地辯之談天著撰不工王隱文寧逮意嬾
慢相會嵇康志有所安而早預宗盟又連姻媾曲蒙賞會
畧過輩流況拔自州人昇爲座客將何以詠歌盛德祇奉
深恩覲冒不容顧瞻自失伏以仍世羈宦厥家屢遷占數
爲民莫尋喬木畫宮受弔曾乏樊廬近以親族相依友朋
見處卜鄰上國移貫長安始議聚糧俄霑厚賜衣裾輕楚
疋帛珍華負荷不勝推讓何及雖婁公說漢不問乎褐衣
帛衣而孔子觀周亦資於一車二豎策微往哲事過前修

倘非因不失親愛忘其醜退惟寒薄安所克堪白露初凝
朱門漸遠西園公子恨軒蓋之難攀東道主人仰館穀而
猶在丹霄不泯白首知歸伏惟終始憐察

上河陽李大夫狀

祇承人迴伏奉誨示并賜借騾馬及野戎館熟食草料等
將遠燕昭之臺猶入鄭莊之館退自循揣實踰津涯况又
卹以長途假之駿足一日而至借車非類於東方千里以
遙乘騾更同於荀子拜違漸遠負荷彌深還望恩光不勝
攀戀

上孫學士狀

學士長離耀彩仁壽含明奮詞鋒而赤堇慙鉉鈞雅音而
泗濱韜響纔踰壯室榮入禁林况自近年仍多大政藩方
逆豎夷虜饑戎於雷霆赫怒之時在朝夕論思之地謀惟
入獻事隔外朝載觀掃蕩之勲密見發揮之力便當輟於
內署錫彼庶方推禹謨殷誥之文贊堯日舜風之化伏惟
爲國自重某早遊德宇嘗接恩門童冠相隨陪舞雩於沂
水星灰未幾隔高宴於柏梁蘭薄懷芳瑤波佇潤竊期光
價微借疎蕪濡筆臨牋不勝丹慊

上容州李中丞狀

二十一翁儒學上流簪纓雅望自還郡印復坐卿曹激水
搏風匪伊朝夕不謂復行萬里又擁再麾竊料徵還不出
歲杪馬伏波遠征交趾去歷三年葛丞相深入不毛時當
五月苟夙夜匪懈卽福祿無疆區區下情誠望在此某方
卧疴一室收跡他山仰望伏熊但羨飛鳥下情不任結戀
之至

上韋舍人狀

舍人發揮帝業潤飾王言三代典謨燠然明具兩漢文雅

庸可比儔今者運屬長君理當哲輔固以復中書之典法
舉政事之本根贊助嘉猷裨成睿化則書辭典冊乃綸閣
之餘事也況舍人以至公御物盛德當官率周廟之駿奔
極漢庭之議論佇見顯司樞物允致昇平況在諸生倚望
猶切某淹滯洛下貧病相仍去冬專使家僮起居今春亦
憑令狐郎中附狀伏審職業殷重朝直頻繁雖榮翰之未
臨豈遺簪之或忘某疎愚成性采和難移徒以頃蒙舍人
獎以小文致之高第果成荒棄上負維持無田可耕有累
未遣蓆門晝永或曠日方餐蓬戶夜寒則通宵罷寐懷書

竊媿拂硯增悲違奉音徽若隔霄漢量陂結戀但傾鳬藻
之誠德宇近心尚阻燕泥之託下情無任攀戀感激之至

上劉舍人狀

違闕稍久結戀伏深前月獲望門牆值有賓客吐辭未盡
受顧如初某孤僻寡徒嬾慢成性虞生治易衆論同侵揚
子草元當時共笑因緣一命羈縲三年常賴恩知免至顛
殞伏以士之營道抱器處世立名誠宜俟彼時來亦在申
於知者內惟庸薄切有比方陳蕃甚貧未欲掃除一室孟
光雖醜已嘗偃蹇數夫倚望光輝實在造次伏惟終始念

金定白眉子
卷一百一十三
二
察

上鄭州李舍人狀

伏奉榮示伏蒙賜及麥粥餅啖餽酒等謹依捧領訖某慶
耀之辰早蒙抽擢孤殘之後仍被庇庥獲於芟薙之時累
受珍精之賜恩同上客禮異編氓桑梓有光里閭加敬負
米之養雖無及於終身求粟於人幸不慙於往聖下情不
任感恩隕涕之至

上鄭州李舍人狀

伏承中元進受治籙兼建妙齋十二叔叶潤靈津凝華霄

極旣窮理於多能之聖復格神於衆妙之門固以紫簡題
名黃寧虛位合兼上治式統高真況齊直是因符圖載演
敕地官而校善合天衆以標虔湯谷傳經當同昔日寨林
合唱復現今時信九館之靈遊實三清之盛會某常憑元
慶屬預嘉招今者遐啟雲裝且縈塵累不獲觀光鶴嶺贊
禮鹿堂空吟有待之詩徒鬱非才之恨伏惟亦賜鑒察

上鄭州李舍人狀

昨者累旬陪侍坐下賚賜稠疊宴樂頻仍雖曾參不列於
四科昔嘗爲恨而徐穉再升於上榻今實爲榮庥蔭光塵

激切誠抱嚮望門館不任下情伏惟特賜恩亮

上鄭州李舍人狀

陳尊師至伏承紫極宮中大延法衆遷受治職加領真階
景氣晏清章辭御徹此固誠通無始跡契自然不然者又
安能於憧憧四達之衢建眇眇三清之事某良緣夙薄俗
累多縈夏秋已來疾苦相繼仰瞻道會有間初心悔責之
來夙宵斯積然但以望恩憐所至乘濟度之因期於異時
必獲覩奧則燕昭雖乏於靈氣陶君亦覲於頑仙伏惟照
察某十月初始議西上續勒家僮齋狀起居諸具後幅諮

謹狀

上李舍人狀

不審近日尊體何如伏計不失調護去冬二十八叔拜迎
軒騎已託從者附狀起居及二十三叔歸闕之時某適有
私故淹留他縣阻拜清光自春又爲鄭州李舍人邀留比
月方還洛下以此久闕附狀用抒下情頃者二十三叔固
辭內廷屈典外郡避榮之心有素頒條之績又彰今則假
道選曹復登綸閣光揚星次煥發天聲爲一代之宗師留
萬古之謨訓凡在儒墨孰不歡忻況某早奉輝光猥至成

立下情豈任抃賀踴躍之至

上李舍人狀

前者伏奉指命令選紀紫極宮功績某自還京洛常抱憂煎骨肉之間病恙相繼章詞雖立點竄未工已懷鄙陋之憂復有淹延之罪更旬日始獲寄上伏惟寬察

上李舍人狀

紫極刊銘合歸才彥猥存荒薄蓋出恩私牽彊以成尤累非少遠蒙寵獎厚賜縑繒已有指揮卽命鐫紀文詞所得妙非幼婦之碑惠賚踰涯數過賁園之帛下情無任捧授

戴荷之至

上李舍人狀

比者伏承尊體小有不安今已平退下情無任欣抃時向
嚴冽伏惟特加頤攝某已決取此月二十一日赴京東望
門牆遠遠恩顧寄誠誓款實貫朝暉伏計亦賜識察舍弟
義叟苦心爲文十二叔憫以弟兄孤介無徒辛勤求已唯
當明祈日月幽禱鬼神願令手足之間早奉陶鈞之賜下
情不任倚望感激隕涕之至

上李舍人狀

不審近日尊體何如伏想冲慮真筌融心妙域神明是保
戩穀來成榮上淹留軒車已曠圭律并德無改玉音愈清
此固擺脫常懷秉持極摯去關鍵於寵辱忘階阼於高卑
彼殷浩空函幾勞開閉仲文枯樹屢歎婆娑比之清光實
有慙德今春華以煦時服初成竹洞松岡蘭塘蕙苑聚星
卜會望月舒吟羊侶接賓共其醒醉謝安諸子例有風流
優游名教之間保奉希夷之道伏思受遇素異諸生去歲
陪遊頗淹樽俎今茲違奉實間山川曲水冰開章臺柳動
子牟豈忘於魏闕嚴助蓋厭於承明仰望恩憐豈任攀戀

况某冗煩有素刻畫難施韓信少時罕蒙推擇揚雄終歲
唯有寂寥向非月旦貽評陽春獲賞則孤根易拔弱羽難
飛答賓戲以那停草客嘲而莫暇撫躬誓款委已銜詞下
筆難休戀柯何極龍門不見將同故椽之心麟史可傳徒
立素臣之位祇迎榮誨遲慰孤誠伏紙臨風杳動心骨

上李舍人狀

伏承尋到東洛不審尊體何如伏計不失調護近數見崔
芻言協律伏承已卜江南隱居轉貼都下舊宅道心歸意
貫動昔賢然外以安危所注內以婚嫁之累竊惟時論或

阻心期況古之貞棲固有肥遁衣食不求於外藥物自有其資乃可謝絕塵間棲遲事表儻猶未也或撓修存若更駐歲華稍優俸入向平無家事之累葛洪有丹火之須然後拂衣求心抗疏乞罷東都帳飲見疎傳之云歸勾曲樓居樂陶公之不返亦可以光昭紫籍振動元門留孤風以動人垂雅裁以鎮俗飲德歸義之士所望在茲伏惟更賜裁度某識雖蒙駉業繼元虛一官一名祇添戮笑片辭隻韻無救寒饑實於浮泛之中早有潛藏之願異時仰陪仙裝去聲歸從元遊庶或收楊許之靈文纂成真誥按烏張之

藥法薄駐流年丹赤之誠造次於是其他並令義叟口啟
不敢繁有諮具

上李舍人狀

不審至今來尊體何如伏以冬年例寒不並常歲伏惟善
加攝護下情所望十七郎文華質氣掩軫輩流便當一鳴
以赴眾望舍弟介特好退龍鍾寡徒獲依彊宗頓見榮路
忻慰之至遠難諮陳伏計亦賜鑒察十二叔淹留伊洛已
變炎涼龍蟄存神鳳翔鑒德賢人事術益以彰明忝預生
徒敢用爲賀某羈官書閣業貧京都徒成拜遠門闌違奉

恩教東望結戀夙宵匪寧至來歲專欲求假起居未間伏
惟特賜榮誨謹狀

賀翰林孫舍人狀

伏承榮加寵命伏惟感慰舍人文苞雅誥道叶皇猷爛雲
藻以敷華叶天聲而應律載遷星次爰奉夏官煥綵服於
蘭堂耀瓊枝於粉署女侍使虛薰錦帳中謁者方奉芝泥
聊用望郎以爲假道佇當仰承睿旨近執化權侶四輔以
燮和合萬錢於供養某厚承恩顧未獲趨承欣賀莫任瞻
戀斯極

上鄭州蕭給事狀

某簪組末流邱樊賤品倏忽三載遭迴一名豈於此生望
有知己充海大夫時因中外嘗賜知憐給事又曲賜哀稱
便垂延納朱門纔入歡席幾陪辱倒屣於蔡伯喈合先王
榮枉開樽於孔文舉宜在襴衡豈伊庸虛便比叨幸今者
方牽行役遽又違離躡履食魚兼預原嘗之客御車登榻
俱參陳李之門生死之寄皆深去住之誠並切伏惟特賜
亮察

上河南盧給事狀

不審近日尊體何如考履納祥爲善降福伏料寢味常保
康寧給事顯自璫闡出臨鼎邑登茲周甸訓此殷頑鋒芒
不鈍而膺宵自分桴鼓稀鳴而囊橐輒露方今惟新庶政
允佇嘉謀載考前人聿求往躅袁司徒入膺論道杜鎮南
出授專征並資尹正之能適致超昇之拜伏惟特爲休運
善保起居下情所望某頑魯無堪退縮有素賦成誰薦食
絕唯歌上累門牆頗淹星律屬人生之坎坷逢世路之推
遷浮泛常多遠離蓋數臨風仰德伏紙含誠緬洛方清瞻
嵩比峻敢同上客曾疑樂廣之弓惟羨小民慙倚庾雲之

碣下情無任瞻戀感激之至

上張雜端狀

保定賢弟昨至纔獲披承已欽夷雅是觀玉季如對金昆
陸有機雲劉惟繇岱豈惟昔日獨有齊名況不差小官無
辭委吏一枝挂旣經在手五斗米安可折腰候館屈才固
難維繫前籌佇美卽議轉遷端公厚賜眷知又聯姻好今
茲折簡復輟吹簫此時敢曰恩門他日便爲世故永言欣
會難以諮陳伏惟亮察

上任郎中狀

伏以華省名曹南臺雜事秩雖亞於獨坐事實同於二丞
向非十九兄貌可室邪名堪鎮俗卽孰得允膺邦直顯副
帝俞在望實之猶歸固選倚而爲重竊惟後命且踐中司
詎比晉臣獨號一臺之妙豈同梁代先資八幅之詳某被
沐恩知淹延歲序徒嗟却埽久曠升堂望赤捧以兢魂想
絳紗而增戀下情無任抃賀之至

與白秀才狀

杜秀才翱至奉傳旨意以遠追先德思耀來昆欲俾虛蕪
用備刊勒承命揣已悲惶莫任伏思太和之初便獲通刺

昇堂辱顧前席交談陳蔡及門功稱文學江黃預會尋列
春秋雖跡有合離時多遷易而永懷高唱嘗託餘暉遂積
分陰俄踰一紀今弟克承堂構允紹家聲將欲署道表阡
繼志述事必在博求雄筆鴻生豈謂愛忘忽茲謀及悚忤
且久辛酸不勝欲遂固辭慮乖莫逆表嚴平於蜀郡誰不
願爲叙郭泰於介休亦惟無愧庶磨鉛鈍聊慰招局伏紙
向風悲憤交積

與白秀才第二狀

前狀中啟述事比者與杜秀才商量只謂卜於下邳克從

欽定全唐文

卷七百七十五

七

三

先次所以須待相國意緒方敢遠應指揮今狀聞便龍門
仰遵遺令事同踴塔兆異佳城敢於不朽之文須演重宣
之義則不敢更稽誠意俟命強宗敬惟照亮

欽定全唐文卷七百七十六目錄

新文藝出版社藏書

李商隱六

爲河東公上西川相國京兆公書

上崔華州書

別令狐拾遺書

與陶進士書

爲濮陽公上四相賀正啟

爲濮陽公上白相公杜相公崔相公馬相公鳳翔

崔相公賀正啟

爲濮陽公賀丁學士啟

爲榮陽公與魏博何相公啟

爲榮陽公賀白相公加刑部尚書啟

爲榮陽公上宣州裴尚書啟

爲榮陽公上浙西鄭尚書啟

爲榮陽公上陳許高尚書啟

爲榮陽公賀太尉王司徒啟

爲榮陽公賀韋相公加禮部尚書啟

爲榮陽公上馬侍郎啟

爲滎陽公與浙東大夫啟

爲滎陽公與三司使大理盧卿啟

爲滎陽公與前浙東楊大夫啟

爲河東公謝柶國京兆公啟

爲河東公謝柶國京兆公第二啟

爲河東公謝相國京兆公第三啟

爲河東公復相國京兆公啟

爲河東公復相國京兆公第二啟

爲河東公上尚書侍郎給事賀冬啟

爲河東公上西川白司徒相公賀冬啟

爲河東公上四相賀冬啟

爲河東公上翰林學士賀冬啟

爲河東公上方鎮武臣賀冬啟

爲湖南座主隴西公賀馬相公登庸啟

爲尚書范陽公賀吏部李相公啟

爲度支盧侍郎賀畢學士啟

爲同州任侍御上崔相國啟

爲賀拔員外上李相公啟

爲桂州盧副使謝聘錢啟

欽定全唐文卷七百七十六

李商隱 六

爲河東公上西川相國京兆公書

姚熊頃時鬪毆偶在坤維阿安未容決平遽詣風憲當道
頻奉臺牒令差從事往推去就之間殊爲未適顧惟敝府
託近貴藩雖蒙與國之恩猶在附庸之列仰遵教指尚懼
尤違敢遣賓僚往專刑獄自奉臺牒夙夜兢惶今謹差節
度判官李商隱侍御往以今月十八日離此某素無材効
早沐恩憐獲接仁風實爲天幸頗希終始以奉恩光事大

之心朝暉是誓其他並附李侍御口述伏爲照察

上崔華州書

中丞閣下愚生二十五年矣五年讀經書七年弄筆硯始聞長老言學道必求古爲文必有師法常悵悵不快退自思曰夫所謂道豈古所謂周公孔子者獨能邪蓋愚與周孔俱身之耳以是有行道不繫今古直揮筆爲文不能攘取經史諱忌時世百經萬書異品殊流又豈能意分出其下哉凡爲進士者五年始爲故賈相國所憎明年病不試又明年復爲今崔宣州所不取居五年間未曾衣袖文章

謁人求知必待其恐不得識其面恐不得讀其書然後乃
出嗚呼愚之道可謂強矣可謂窮矣寧濟其魂魄安養其
氣志成其強拂其窮惟閤下可望輒盡以舊所爲發露左
右恐其意猶未宣洩故復有是說某再拜

別令狐拾遺書

子直足下行日已定昨幸得少展寫足下去後憮然不怡
今早垂致葛衣書辭委曲惻惻無已自昔非有故舊援拔
卒然於稠人中相望見其表得所以類君子者一日相從
百年見肺肝爾來足下仕益達僕困不動固不能有常合

而有常離足下觀人與物共此天地耳錯行雜居螫螫哉
不幸天能恣物之生而不能與物慨然量其欲牙齒者恨
不得翅羽角者又恨不得牙齒此意人與物畧同耳有所
趨故不能無爭有所爭故不能不於同中而有各異耳足
下觀此世其同異如何哉兒冠出門父翁不知其枉正女
笄上車夫人不保其貞汙此於親親不能無異勢也親者
尚爾則不親者惡望其無隙哉故近世交道幾喪欲盡足
下與僕於天獨何稟當此世生而不同此世每一會面一
分散至於慨然相執手嘖然相感泣然相泣者豈於此世

有他事哉惜此世之人率不能如吾之所樂而又甚懼吾之徒子立寡處而與此世者蹄尾紛然蛆吾之白擯置譏誹襲出不意使後日有希吾者且懲吾困而不能堅其守乃捨吾而之他耳足下知與此世者居常給於其黨何語哉必曰吾惡市道嗚呼此輩真手搔鼻齧而喉噦人之灼痕爲癩者市道何肯如此輩邪今一大賈坐滯貨中人人往須之甲得若干曰其贏若干丙曰吾索之乙得若干曰其贏若干戊曰吾索之既與之則欲其蕃不願其亡失口舌拜父母出妻子伏臘相見有贅男女嫁娶有問不幸喪

死有致饋葬有臨送弔哭是何長者大人哉他日甲乙俱入之不欺則又愈得其所欲矣迴環出入如此是終身欲其蕃不願其亡失口舌拜父母益嚴出妻子益敬伏臘相見贅益厚男女嫁娶問益豐不幸喪死饋贈臨送弔哭情益悲是又何長者大人哉惟是於信誓有大期漫然後罵而絕之擊而逐之訖身而勿與通也故一市人率少於大賈而不信者此豈可與此世交者等耶今日赤肝腦相憐明日衆相唾辱皆自其時之與勢耳時之不在勢之移去雖百仁義我百忠信我我尚不顧矣豈不顧已而又唾之

足下果謂市道何如哉今人娶婦入門母姑必祝之曰善相宜則祝曰蕃息後日生女子貯之幽房密寢四隣不得識兄弟以時見欲其好不顧性命卽一日可嫁去是宜擇何如男子者屬之邪今山東大姓家非能違摘天性而不如是至其羔鵲在門有不問賢不肖健病而但論財貨恣求取爲事當其爲女子時誰不恨及爲母婦則亦然彼父子男女天性豈有大於此者耶今尚如此况他舍外人燕生越養而相望相救抵死不相販賣哉細而繹之真令人不愛此世而欲往走遠颺耳果不知足下與僕之守是耶

非耶首陽之二士豈靳盟津之八百吾又何悔焉千百年
下生人之權不在富貴而在直筆者得有此人足下與僕
當有所用意其他復何云云但當管不羞市道而又不爲
忘其素恨之母婦耳商隱再拜

與陶進士書

去一月多故不常在故屢辱吾子之至皆不覩昨又垂示
東岡記等數篇不惟其辭彩奧大不宜爲冗慢無勢者所
窺見且又厚紙謹字如貢大諸侯卿士及前達有文章積
學者何其禮甚厚而所與之甚下耶始僕小時得劉氏六

說讀之嘗得其語曰是非繫於褒貶不繫於賞罰禮樂繫於有道不繫於有司密記之蓋嘗於春秋法度聖人綱紀久羨懷藏不敢薄賤聯綴比次手書口詠非惟求以爲已而已亦祈以爲後來隨行者之所師稟已而被鄉曲所薦入來京師久亦思前輩達者固已有是人矣有則吾將依之繫鞅出門寂寞往返其間數年卒無所得私怪之而比有相親者曰子之書宜貢於某氏某氏可以爲子之依歸矣卽走往貢之出其書乃復有置之而不暇讀者又有默而視之不暇朗讀者又有始朗讀而終有失字壞句不見

本義者進不敢問退不能解默默已已不復咨歎故自大和七年後雖尚應舉除吉函書及人憑倩作牋啟銘表之外不復作文文尚不復作况復能學人行卷耶時獨令狐補闕最相厚歲歲爲寫出舊文納貢院既得引試會故人夏口主舉人時素重令狐賢明一日見之於朝揖曰八郎之交誰最善綯直進曰李商隱者三道而退亦不爲薦託之辭故夏口與及第然此時實於文章懈退不復細意經營述作乃命合爲夏口門人之一數耳爾後兩應科目者又以應舉時與一裴生者善復與其挽洩不得已而入耳

前年乃爲吏部上之中書歸自驚笑又復懊恨周李二學士以大法加我夫所謂博學宏辭者豈容易哉天地之災變盡解矣人事之興廢盡究矣皇王之道盡識矣聖賢之文盡知矣而又下及蟲豸草木鬼神精魅一物已上莫不開會此其可以當博學宏辭者邪恐猶未也設他日或朝廷或持權衡大臣宰相問一事詰一物小若毛甲而時脫有盡不能知者則號博學宏辭者當有罪矣私自恐懼憂若囚械後幸有中書長者曰此人不堪抹去之乃大快樂曰此後不能知東西左右亦不畏矣去年入南塲作判比

於江淮選人正得不憂長名放耳尋復啟與曹主求尉於號實以太夫人年高樂近地有山水者而又其家窮弟妹細累喜得賤薪菜處相養活耳始至官以活獄不合人意輒退去將遂脫衣置笏永夷農牧會今太守憐之催去復任逕使不爲升斗汲汲疲瘁低儼耳然至於文字章句愈帖息不敢驚張嘗自呪願得時人曰此物不識字此物不知書是吾生獲忠肅之謚也而吾子反殷勤如此者豈不知耶豈有意耶不知則可有意則已虛矣然所以拳拳而不能忘者正以往年愛華山之爲山而有三得始得其卑

者朝高者復得其揭然無附著而又得其近而能遠思欲窮搜極討灑豁襟抱始以往來番番不遂其願間者得李生於華郵爲我指引巖谷列視生植僅得其半又得謝生於雲臺觀暮留止宿旦相與去愈復記熟後又復得吾子於邑中至其所不至者於華之山無恨矣三人力耶今李生已得第而又爲老貴人從事雲臺生亦顯然有聞於諸公間吾子之文粲然成就如是不負華之山而華之山亦將不負吾子之三人矣以是思得聚會話旣往探歷之勝至於切磋善惡分擘進趨僕此世固不待學奴婢下人

指誓神佛而後已耳吾子何所用意耶明日東去旣不得
面寓書惘惘九月三日宏農尉李某頓首

爲濮陽公上四相賀正啟

伏以春日青陽歲當更始思將萬壽以奉三台伏惟相公
與國同休自天逢福唐堯之八十六載永奉宸聰周文之
九十七年長承睿算某方臨征鎮伏賀無由攀戀禱祠不
任丹懇

爲濮陽公上白相公杜相公崔相公馬相公鳳翔

崔相公賀正啟

伏以律中太族月貞孟陬迎祥旣積於元正善祝方資於
難老伏惟相公金相轉瑩玉德踰資小甘茂之十官倖叔
敖之三相使巖廊之上永作吾家埏埴之功長爲已任某
方臨戎鎮拜賀末由攀戀禱祠不任丹懇伏惟鑒察

爲濮陽公賀丁學士啟

學士位以才昇官由德舉光揚中旨潤飾洪猷允謂當仁
果從真拜墨丸赤管豈滯於南宮黃紙紫泥聊過於禁掖
鳳池甚邇雞樹非遙副此具瞻當在後命某燒烽邊郡題
鼓軍門仰鸞鶴於煙霄空悲路阻顧蟣蝨於介冑尚恨形

留拜賀未期欽戀無喻

爲滎陽公與魏博何相公啟

不審近日尊體如何伏計不失調護鄴都奧壤漢相威名
出則主諸侯之名以除叛亂入則峻將軍之令以養疲羸
作大君之膺腸樹列國之標表名光圖史勲溢旂常凡在
小藩永佩高義屬封疆僻左民落凋殊奇貨難求使材莫
稱相公曲垂記獎先降尊嚴李押侍御右職名家多聞好
禮遠持書幣逕冒風波受賜踰涯傳情曲盡載思復命未
得其人輒託還裝用申徵獻路遙漳水夢隔頓邱未期胥

命於蒲但仰餘波及晉勤拳夙夜師慕忠貞伏惟仁恩亦
賜知察

爲滎陽公賀白相公加刑部尚書啟

相公克佐昌期允符俊德耀握中之至寶高價難酬縱堂
上之奇兵善師無敵述成徽冊導降恩波由中祕書兼大
司寇羅含吞鳳追佳夢於當年少皞爽鳩集芳塵於此日
百蠻仰化九縣畏威某早奉陶甄謬當藩服雖深抃賀未
卜趨承遵呂刑而但戒守官望魯酒而必期盡醉抃躍瞻
戀不任下情

爲滎陽公上宣州裴尚書啟

近已有狀不審諸况比復何如待詔漢廷但成老大留歡
湘浦慙復清狂思如昨辰又已改歲以公美之才之望固
令早還廊廟速泰寔區而辜負明時優游外地豈是徐公
多風亭月觀之好爲復孟守專生天成佛之求幸當審君
子之行藏同丈夫之憂樂乃故人之深望也李處士藝術
深博議論縱橫敢曰賢於仲尼且慮失之子羽云於江沔
要有淹留便假以節巡託之好幣十一月初離此訖未由
披盡勤戀增誠其他並付使人口述

爲滎陽公上浙西鄭尚書啟

不審近日諸况何若第高標令範早映朝端惠露仁風載
光藩寄况地雄東海郡控南徐當皇心妙簡之難是國用
取資之地斯焉假道以副具瞻况忝亢宗允俟嘉會此方
且多雜俗又異輿區但餘江山記在方誌然將以比西州
東府白下朱方則亦遼豕爲慙葉龍知懼矣而里閭凋弊
谿洞幽遐內惟短材常愧尸祿道路綿邈懷抱淒涼未期
雲霧之披空屬池塘之思餘并附某乙口述

爲滎陽公上陳許高尚書啟

伏見制書尚書克懷懋德心贊明時殊祥取貴於龜龍大
樂受鈞於金石以秩宗典禮以司馬總戎况潁水遺封許
田奧壤輦洛亘其後宛葉居其前版籍則方城之外人幕
府則淮陽之勁卒唯茲巨訪疑實屬當仁荀爽驟拜司空
黃霸入爲丞相遺踪且在後命非遙早忝恩加倍注誠款

爲滎陽公賀太尉王司徒啟

近者黨項侵擾西道崛強北邊仰聞天威將事電掃果從
貴府首建行臺蓋以藉司徒大鹵之先聲壺關之舊戍謀
於羣后允屬當仁凡在藩方不勝欣愜伏計上軍已有行

日諸將并受嚴期是賈復先登之秋乃樊噲橫行之日弓
聲破漠劍氣凌雲但恐犬羊不足以當誅鋤鐘鼎不足以
銘功業某素無韜畧忝恩榮當悲苦之餘值空困之後
前騶負羽不展平生瞻望中權唯積私懇伏惟俯賜亮察
爲榮陽公賀韋相公加禮部尚書啟

相公祥金淬刃羣玉排峯樂和而穴鳳來儀氣正而路牛
無喘歸美旣彰於天載懋官旋踐於春卿周官則日諧萬
人虞書則日典三禮苟非全氣孰贊昌期係萬國之懸誠
加一人之德色某早蒙恩異今創辭離蘭省春深伏謁尚

遙於八座桂林夜靜仰占唯見於三台抃賀末由戀結空
極

爲滎陽公上馬侍郎啟

蒙恩左遷不任感懼某謬居職守實昧官常不能束矢窮
辭鈞金就直屢移時序竟致紛披故府李相公案吏之初
具獄來上某久爲賓佐方副臺綱若其間必有阿私則先
事固當請託實無一字難誑九泉崔監察是湖南李相公
門生是某所拜雜端日御史遠差推事旣無所囑求近欲
叫寃豈遽能止遏不知何怨乃爾相窮容易操心加誣唱

首門生之分尚或若斯常僚之情固無足算九重邃邈五
嶺幽遐若從彼書辭信其文致卽處於嚴譴未日當辜直
遇侍郎察以疎蕪知非侮鬻照姦吏之推過略崔子之枝
辭特念遠藩獲用寬典纔移廉部尚處頒條實繫如燭之
明敢不知風所自末由謁謝空抱款誠

爲滎陽公與浙東大夫啟

不審近日諸趣何如越水稽峯乃天下之勝概桂林孔穴
成夢中之舊遊遐想風姿無不暢愜一分襟袖三變寒暄
雖思逸少之蘭亭敢厭桓公之竹馬况去思遺愛遐布歌

謠酒興詩情深留景物庾樓吟望謝墅遊娛方知繼組之
難不止頒條之事今者冰消雪薄江麗山春訪古跡於暨
羅探異書於禹穴不知兩樂何者爲先幸謝故人勉自遵
攝未期展豁唯望音符其他并附喬可方口述

爲滎陽公與三司使大理盧卿啟

蒙恩左遷不任感懼某頃以疎拙謬副紀綱不能辨軍府
之獻囚折王庭之坐獄將踰五載終辱三司過實已招咎
將誰執故府李相公知舊之分與道爲徒戎幕賓筵雖則
深蒙獎拔事蹤畫跡實非曲有指揮逝者難誣言之罔媿

且崔監察元藻是湖南李相公首科門生是其所薦御史
將赴淮海私間尚不囑求及還京師公共豈能遏塞昨蒙
辨引稍近加誣座主旣不免於款中雜端固無逃於筆下
乘時幸遠背惠加誣旣置對之莫由豈自明之有望若據
其證逮按彼詞連則處以嚴科無所逃責猶賴九天知其
乖運伏念非欲固用深文不從鍛鍊之科得在平反之數
揣心知幸感分增榮拜謝末由惶戀無極

爲滎陽公與前浙東楊大夫啟

近已遣押衙喬可方齎少信幣聘謁計程已過衡湘方將

遐仰清風不謂先霑膏雨今月二十日專使林押衙至緘
詞重疊贈貺豐厚皆晉地之所生也而秦不產一物焉使
乎方來已承徵詔下車投兩則致謳謠高浪順風難窺飛
止榮聞休暢何樂如之某頃副憲網昧於官守早乖審克
久乃發揚舊吏常僚微有誣引小藩遠地難自辨明若從
文致之科合用投荒之典尚蒙恩宥獲頒詔條省罪撫心
不任感懼鄙人嚮學之後操心有歸至於率履公塗承迎
親友雖多乖時態或不愧座銘又用高明常所照信至於
機微之會用捨之間既有命有時亦何思何慮更將尚口

彌失處躬以今月二十三日南去家無甚累官忝古侯外
以勸課蠻夷內以訓摩子弟惟將悔過以立後圖鄧禹之
止望功曹赤也之願爲小相古猶有是余獨何人不因遭
值聖明階緣叨竊則修揚郡守乃山東書生禱祠之所求
也負責雖懼循涯則驚多謝故人慎加頤保騰凌紫闥步
武青雲時因南風不至遐棄厚幸

爲河東公謝相國京兆公啟

某啟今月某日得當道萬安驛狀報伏承遣兵馬使陳朗
賁幣帛鞍馬辟召小男者未敢尋盟遽茲聞喜遐瞻闔闔

恨乏羽毛伏以自有搢紳誰無交結朋友不全素諾在古
殊多父子同受深知當今罕見豈期令德圖於所難男珪
曾未成人纔沾下第辦仲謀之菽麥雖則有餘况安石之
芝蘭竊將不可忽依大府便厠英僚東吳之貽恐自此始
西園之讌未知如何此皆相公以某謬接藩維久依繩墨
克降由衷之信將酬事大之心不然則安得拔童子於舞
雩禮諸生於白社身枝獲慶城府知歸感激恩光丁寧教
誡永言銘鏤尚昧端倪伏候簡書來至敝邑則專請張覲
評事奉啟狀申陳慕義無窮措辭莫盡攀附惶戢不能究

陳謹啟

爲河東公謝相國京兆公第二啟

某啟伏奉榮示伏蒙辟署某第二子前鄉貢進士珪充攝
劍南西川安撫巡官并賜公牒舉者某去月得楊侍御書
題微傳風旨初如吉夢終謂戲談非不尋思莫得端緒今
乃竟詢仲允果降嘉招伸紙發緘悸魂流汗何者某頃居
班列已奉陶甄口裏雌黃屢加雕煥胷中雲夢過沐涵濡
掀之以順風暖之以愛日茲辰議報不在他門一昨叨列
土田謬分旗蓋適當東道獲事西鄰豈望信在言前榮流

意外坤維接畛何酬上相之知坎卦成名遂報中男之喜
且渠譽乖郝桂名媿謝蘭未學周南召南纔得一科一第
縱解問絹不能負薪將何以與先生並行從大夫之後仰
塵帷幄佇雜簪纓况襟帶禹同咽喉巴濮求於安撫必也
機謀深慮異時莫副虛佇然竊尋史傳所載語父子之間
雖石苞獨異石崇而山濤不知山簡亦豈敢保其孱陋遽
遣退藏但當授以一經訓之大杖庶將寡過以謝明恩染
翰銜情封牋寫抱小人多事拜台席以猶賒童子何知上
賓階而在卽瞻望閭闔死生以之伏惟深賜鑒信謹啟

爲河東公謝相國京兆公第三啟

伏奉別紙榮示欲令男珪仰從麾旆感激重顧寢興失常
相公爰自奧區將臨巨鎮當求國器以耀戎旃渠書劒無
聞凝點相半昨者謬蒙與國命厠羣僚發遣已來憂慙未
定豈可再升上榻重託後車混七子之聲塵列三公之掾
屬所虞辱命安敢顧私況古之在三父生師教今世旣無
師道所奉之主當焉渠雖甚愚亦知斯義倘得永依油幕
長侍絳紗雖闕晨昏乃在霄漢向垂詢度伏用兢惶以渠
將遠依投猶須教督伏望許乘驛馬假道弊藩三五日卽

遣榜小舟倍程下水必令界內得及軍前恩紀綢繆光榮
浹洽雖萬里將遠實人心不孤言路情塗所難申喻伏紙
擗管死生以之

爲河東公復相國京兆公啟

今月某日已遣某職鮮于位奉啟狀謁賀新寵至某日復
遣脚力某乙奉啟仰諮行李願就坦夷今日蒙降專人且
云告别正書輝握橫涕霑襟實影響以疚懷豈平生之易
感伏承決取峽路東指廣陵相公亟厯雄藩惟循儉德空
持經笥不事橐裝固以忠貫波神仁懷風伯自然利涉安

有畏途雖二江雙流懸蜀土去思之懇而一日十旦慰揚
州來暮之謠封域匪遐藩宣爲累不獲仰瞻使節竊止仙
舟感戀之誠寄喻無所今遣節度判官李商隱侍御往渝
州及界首已來備具餽牽指揮館遞伏惟俯從祖軼暫駐
征帆南望烟波恨無毛羽下情不任瞻戀感激之至

爲河東公復相國京兆公第二啟

今月某日潘押衙侍御至伏蒙仁恩榮賜手筆數幅某獲
依大國切曰親隣將欲違離彌驚顧遇但當眴涕用對緘
封伏承鳳詔已頒鷁舟期艤日臨端午路止半千不獲親

祝松年躬攀檜楫持百錢而莫追劉寵聞五鼓而空憶鄧攸仰望旌幢恨非巾履自觀符竹乃是網羅縱詞窮於刀筆之間終事溢於肺腸之外感恩戀德不知所爲

爲河東公上尚書侍郎給事賀冬啟

伏以水謝舊筩灰驚新律乘陰閉陽開之候見詠功祝壽之辰伏惟某官道以和光謙而受益皇恩三接且聞宣室之言清禁九重續奉台階之寄膺時納祐與國同休某方守藩維闕趨門屏無任結戀之至

爲河東公上西川白司徒相公賀冬啟

伏以水謝舊筩灰驚新律乘陰閉陽開之候見詠功祝壽
之辰伏惟相公便自坤維更承兌澤遽收武節長轉洪鈞
昔風后之佐軒皇不爲外相傳說之毗殷帝無敢專征獲
奉恩知實所欣賴屬緣戎鎮闕詣軒庭數攀戀以誠深與
願望而俱切

爲河東公上四相賀冬啟

伏以節在一陽慶歸三壽君子旣聞於齋戒小人寧望於
禱祈伏惟相公芝鶴延年松龜定命上毗左契下轉洪鈞
立蒿柱之前長辭舜瑄侍土階之側永數堯萱某方限戎

行不獲拜賀攀戀之至實倍常倫

爲河東公上翰林院學士賀冬啟

伏以周正具至魯朔爰來禱祠旣集於良辰戩穀且歸於
內署伏惟學士靈龜薦壽威鳳均祥居石室於西崑自通
仙路坐銀臺於東海不接人寰豈惟與國同休兼亦後天
而老某方叨戎律正遠霄階珪賀未由結戀增劇

爲河東公上方鎮武臣賀冬啟

伏惟克隆多福永對休辰以竹苞松茂之姿奉周宸漢帷
之化某方叨藩任款賀無由瞻戀之誠寄喻無所

爲湖南座主隴西公賀馬相公登庸啟

伏見某月日恩制相公登庸凡在藩方莫不稱慶相公恢
宏廣度疎越正聲君子卷舒不違於仁義丈夫憂樂唯繫
於邦家吳漢之不離公門袁安之每念王室今果明臺納
諫武帳陳謨寧勞夢卜之資自契鹽梅之望况聖上儲精
垂思保大定功推軒后師臣之規得周成畏相之道三古
之英華未遠百王之損益可知仗乎元臣佇啟休運以不
愆不忘貞百度以無偏無黨定九流仁遠乎哉古猶今也
斯固祖宗降意華夏同誠某早忝恩光今當譴責思昔時

之叨位媿汗仍流賀今日之登賢歡心莫寄矧復系通屬籍任處藩條至於馳誠實倍常品伏惟鑒察

爲尚書范陽公賀吏部李相公啟

伏見今月某日制書伏承榮加寵命伏惟感慰伏以天垂北斗國有南宮伊法象之所存實根源之是繫伏惟相公中邱降瑞太昴垂芒列子以謂神全孟子之言性善抑揚今古秀絕天人動之則舟楫鹽梅不忘於康濟靜之則風松霞月莫究其孤高擅文武之無雙處品流之第一自頃事有消長時屬往居未啟金滕且分竹使而能用元元易

守之道體金人不動之微神明無關於保持柯葉罔聞於
易置龍樓入護虎節出征重安四海之心實慶一人之福
今又薦承雨露顯執銓衡惟彼天官是稱冢宰周以太保
領晉以侍中兼步驟雖殊考課斯在固當復持大柄重上
泰階未求李重之箴已作臯陶之誥伏計仰緣宗社愼保
寢興某早奉恩知又牽事任支離門下辛苦兵間非騏驥
盛壯之時有手足凋零之痛遐思賀訴唯動禱祠戀德依
仁不勝丹赤

爲度支盧侍郎賀畢學士啟

伏見除書伏承榮加寵命伏惟感慰伏以振域中之綱紀
屬在南臺極河內之文章歸於西署唯茲出入不在尋常
郎中學士吞鳥推華奪袍著美纔端風憲俄上雲衢昨暮
繡衣尚遣蒼鷹出使今辰綵筆遂令丹鳳銜書聞仙家勿
洩之言見人世未知之事便當圖南勢就拱北功成擊水
搏風一舉千里某常懷疇曩叨奉眷知乏仰冰雪之清標
空聞金石之孤韻敢言投分自賀知人今則坎軻藩維淹
留氣律兵法雖慙於金版夢魂猶識於銀臺恨非犯斗之
星斲經寥汰徒用映淮之月遠比輝光抃賀之餘兼有倚

望伏冀必賜監察

爲同州任侍御上崔相國啟

憲啟憲質異楚材寶同燕石重以羈絆卽定憫凶瞻遺構
以闕然不堪多難奉成書而未就無處求生藐視流離屢
經寒暑逮於旣冠猶恤無家叨承師友之規獲忝簪纓之
列此皆相公推孔李之素分念高國之舊家鏤朴雕頑披
龔扶賸沐膏雨以令植假順風而使飛不然則安得獲驪
龍之珠假獬豸之角榮皆過望感豈勝言而猶悵望下風
徘徊高義望賀燕以難去撫棲鳥而不安者蓋以相公以

伊臯之事業佐大君以揚馬之文章輔昌運一登宣室遂
借前籌以有征無戰之方彰明下武以永逸暨勞之勢恢
拓中華不舞梯輶不鳴金鼓復數千里之沃野刷十五聖
之包羞彼圍穀而穀人不知入鄭而鄭陴皆哭方茲決勝
彼有多慚今百職聿修九功咸敘萬國佇登封之禮五山
傾望幸之祥鰈至鷁來茅歸楛入馳湯驟夏輶漢陵周若
憲者雖不能行舞舜戈坐耕堯壤至於獻千載河清之序
裁二王助祭之詩歌咏相庭發輝帝載則其志願亦或庶
幾伏希孫閭時開丙茵多恕克懋山公之德終全趙氏之

孤擁簪瞻門封函卽路苑沙宮樹雖吟左輔之風煙良夜
慶霄唯望中台之晷度感恩撫已誓志投誠仰惟輝光終
賜埏埴下情無任感激攀倚惶戀之至

爲賀拔員外上李相公啟

某啟某聞被彩飾於無用之姿斯須或可垂休光於不報
之地始卒攸難至有馬疲而尚服輕軒席敞而猶存華幄
懷仁則極備用無聞雖有切於戀思宜自量其涯分嗚呼
某者今甚類焉翰柔莫申語苦難聽聊憑牋素用寫肺腸
伏惟少霽尊嚴猥賜披省某伏思早歲仰累深知龍尾貽

譏敢通交契牛心前啗實愧時才世故推遷年華荏苒
灰檀火屢變於寒暄靈濟泥涇遂分於清濁羈離管割
僂俛絃歌名汙柳營顏慚花縣竟以千金乏產三徑無
歸初服莫從迷津亟問屬者伏幸相公羹梅調味川楫
濟時起塌翼於衝風活枯鱗於涸轍登諸蘭署轄彼芸
籤臺閣移文語薛夏而無取東南才子並張率以何能
未報前叨旋承後顧版圖被召花幕分榮收駑駘於阜
棧之中刻蚣蝮於樂懸之上勢高足跌道泰身屯未竭
私誠已嬰沈痼况某素無靈氣夙昧攝生乏單豹養內
之功闕王吉實下之

效湫底莫適節宣失中然猶深願待年少酬厚德三醫畢
訪百藥皆投竟非无妄之災莫見有瘳之候濱於九死憂
彼十旬取煖則煩加寒必痢髮寧支弁帶不成圍謝述心
虛方茲未逮田光精竭比此猶強豈可尚占職員但尸俸
入久塵物議且速殘骸况相公職統薄違時登衆寡任崇
按比務繫孤終職是賓僚豈宜虛曠固不可下私微物曲
降深慈憫將盡於桑榆妨得材於杞梓是以推枕興感攝
衾占辭願申斂跡之期以贖曠官之咎祇聽裁旨用息兢
惶必也舊履流恩遺簪結念恤以孀孤非少婚嫁未終不

使衰羸便辭祿仕致乎外地晞以末光未乖念錄之仁稍
減憂慚之累亞尹諸府別乘近郊負荷無羞饘餼有繼則
猶冀逢十全之藝延一日之生重登門牆再就埏埴是所
願也非所望也詞多力殆感極涕繁避席承言未卜曾參
之侍封函抒款畏遺殷浩之書瞻望清光實動魂守伏惟
特賜優詒

爲桂州盧副使謝聘錢啟

戡啟錢若干伏蒙賜備行李謹依數捧領訖多若鑿山積
如別藏丙科擢第未全染於桂香盛府從知却自驚於銅

真禮於是重富而可求既不憂貧惟思報德伏惟俯鑒微
懇謹啟